

Wuruti

Sεmε wemu w'a Wuruti wo keree kee ge

Elimelεki ni wu kpuun li keree

¹ Cana nii lemu ni Yawutuu pu wo fanha ki bye kiirikɔɔn pu keɲε ni ge, xuugo ka ya pa jε fiige ki ni lee cana nii li ni. A Betilεhemu shεn ná wa di yìri ni wu shɔ ni wu jalaa shuun ni Zhude fiige ki ni, na shε tatεεnge sha Mowabu fiige ki ni. ² Wee ná wu mεge ki bye na Elimelεki, wu shɔ wu mεge di ɲε na Nɔmi, ja wa mεge di ɲε na Makilɔn, wusama mεge di ɲε na Kilijɔn. Efirata shi shεen pu bye pii na foro Zhude fiige ki ni Betilεhemu ni. Ba p'a nɔ Mowabu fiige ki ni wε, na diin wà.

³ A Nɔmi poo Elimelεki wu ba xhu, na Nɔmi ni jalaa shuun wu yaha wà. ⁴ A pee jalaa p'i ba Mowabu shi wu wo pushaa shuun wa leɲε. Cee wa mεge ki bye na Ɔripa, wa mεge di ɲε na Wuruti. A p'i yèe ke shishiin pye wà. ⁵ Lee kadugo na a Makilɔn ni Kilijɔn wu bε di ba xhu. Ayiwa, a Nɔmi di bɔɔn wu poo we, ni wu jalaa shuun wu ni.

Wuruti ya taha Nɔmi na na pa Betilεhemu ni

⁶ Ayiwa, ba Nɔmi ya pa logo na Tεhεnε Baa Kilε ya wu shi shεen pu tεge, na ɲɔlige kan pu mu na wu yaha Mowabu fiige ki ni wε, a wu ni jalaa cèe p'i gbegele na p'i yìri wà, p'a gaanɲi wu to fiige ki ni. ⁷ Wee tuun wu ni, xuu wemu ni pu bi tiin ge, a wu yìri wee xuu wu ni. A jalaa cèe shuun wu bε

di daha wu na. A p'i koo lo na guri na gaanji Zhuda fiige ki ni.

⁸ Wee tuun wu ni a Nomi di wu jalaa cèe shuun wu pye: «Yi shuun wu beeri pu kuri, wa beeri w'a se wu nu puga. Y'a saama pye ne na, piimu p'a xu ge, na saama pye pee be na. Tehenε Baa Kile wu she jo yi be na mu lee jogana li na! ⁹ Tehenε Baa Kile wu she janiε kan yi beeri nigin nigin wu mu yi namaa gbaya ni!» A wu xho na jooonro fò kan pu mu. A p'i sipyaa le na suu. ¹⁰ A p'i Nomi pye: «Ahayi! Wèe na daha ma na da gaanji fo ma shi sheen pu wo fiige ki ni.»

¹¹ A Nomi di pu pye: «Na nagoo, yi kuri! Naha na y'a da binne da se ni na ni we? Jire n'a da ba gan sanha jalaa piitiilee mu pee pu ta jeri yi namaa laa? ¹² Yi kuri y'a se na nagoo! Y'a se! Ne le toro gbajiire taan. Ali ná jhe da ba bye ne mu nijaa ye pyaa, na jo ne dà li na jo ne na ba funaḡaa kii se, ¹³ ta yee bi da zhe shege na gbaya ni, yi na yere fo pee ba le, p'i na yi leje pye pu cèe ge? Ahayi, na nagoo! Kanhama pemu pu wa ne na ge, p'a soro fo xuuni na toro yee wo pu taan, bani Tehenε Baa Kile ya wu keje ki fanha digi ne na. ¹⁴ A p'i sipyaa kii su sanha. Lee kadugo na a Jripa di jooonro fò kan wu yasho wu mu, na gari, ga a Wuruti di daha yaha wu feni. ¹⁵ A Nomi di ba Wuruti pye: «Ma cuun wu wii w'a kari wu puga sheen ni wu peje yanmuyò yi yiri. Ma be wu kuri m'a se wu feni.»

¹⁶ Ga a Wuruti di jo: «Ma ganha bu na kori, fo di laha ma na di guri ma feni we! Bani xuu xuu ni m'a gaanji ge, wa ne be w'a da se. Xuu xuu ni m'a da diin ge, wa ne be w'a da diin. Piimu pu je ma wo shi sheen pu ge, pee na bye ne be wo shi sheen.

Wemu wu ƚε ma wo Kile wu ge, wee na bye ne be wo Kile we. ¹⁷ Xuu beeri ni m'a she xhu ge, wa ne be w'a da xhuu, p'i na le wa. Kaa latii bu ne waa laha mu na xu kadugo na, Tehehe Baa Kile wu kanhama nigbo shan na ƚuƚo ni!» ¹⁸ Ba Nomi ya Wuruti ta w'a noro yaha wu na lee norogana li na we, wu ya yaaga jo nige we.

¹⁹ Wee tuun wu ni a p'i gari mu shiizhan fo na she no Betilehemu ni. Ba p'a no je wa we, a lee di kulo li sheen pu beeri fo. A ce e p'i ganha na yu: «Nomi w'a sii tii pye we ya?» ²⁰ A Nomi di pu ƚo sho na: «Yi ganha ba na pyi nige Nomi we (Nomi kori ƚε fereme fo), ga y'a na pyi Mara (lee kori ƚε kanhama fo), bani Se Beeri Fo ya kanhama shan ne ƚuƚo ni. ²¹ Tuun wemu ni ne foro naha na gaaji ge, ne bye yara fo, ga a Tehehe Baa Kile di she ne kewaye wo kuruƚo na pa lehe. Naha na yi na pyi sanha Nomi na Tehehe Baa Kile yaha w'a nmahana ƚeri ne feni we? Se Beeri Fo w'a boong shan ne ƚuƚo ni.»

²² Ayiwa, mu Nomi ni wu ja sho Mowabu shi shen Wuruti w'a kuri pa mu lee pagana li na na yiri Mowabu fiige ki ni. Orije* shinma wu wo yaloro ti loduun ni p'a no Betilehemu ni.

2

Wuruti ya kari di zhe shinma fugi Bowazi wo tege ni

* **1:22** Orije ƚε shinma ba alikama ƚε we. Ga wu pereme d'a taan. W'a foro maa feni na toro kalaga taan.

¹ Nōmi poo wu puga shen wa bye wà. Ná baraga wo wu bye wii, na ne yara fɔɔ na foro Elimelēki wo kpuun li na. Wee mege ki bye na Bowazi.

² Caŋa ka a Mowabu shi shen Wuruti wu ba Nōmi pye: «Na yaha di she kereye yi ni, wa bu she nuŋɔ ŋaari na na, di da shinma furi weefɔɔ feni. A Nōmi di wu pye: «Ta se na poro!» ³ Wee tuun wu ni a wu gari tege ka ni, na she ganha na shinma wu furi faapyii pii feni. Li kaŋudanga a kee tege k'i she da Bowazi wogo, Elimelēki wo kpuun shen wa.

⁴ Ayiwa, a Bowazi di ba yiri Betilehemu ni na nɔ, na faapyii pu pye: «Yi faabye! Tehenε Baa Kile wu pye ni yi ni!» A p'i wu ŋɔ shɔ na: «Uun faabye! Tehenε Baa Kile wu duba ma mu!» ⁵ Lee kadugo na a Bowazi di faapyii pu nahagbaa fɔɔ wu yiri na wu pye: «Le cebilere le di ne jɔgɔ we?» ⁶ A faapyii pu nahagbaa fɔɔ wu wu ŋɔ shɔ na: «Mowabu shi shen cee wemu w'a taha Nōmi na na pa na yiri Mowabu fiige ki ni ge, wee wu wa. ⁷ W'a ne jeri na ne wu wu yaha wu da furi shinmakɔɔn pu kadugo yiri kalapɔhɔɔ ki te ni. Fo nisɔɔgɔ ki na w'a pa. Wu di pa ge, wu sanha ŋmɔ we, fo nime ye w'a she ŋmɔ jeri.»

⁸ A Bowazi di Wuruti pye: «Na poro, niwegee shan! Ma ganha bu she shinma fugi nige tege katii ni we! Ma ganha bu laraga kɔn nahame na we! M'a gori naha ni na wo kapyebyezaa pu ni! ⁹ Ta pu wii, pu ba xuu wemu kɔɔn, ma da furi wà pu feni! Ne yi jo na kapyebyii pu mu jo wa ganha bu nɔ ma na we. Waga ba ma ta, m'a fulo kuzhɔyɔ yi na, m'a gba kapyebyii pu wo lokogo ki ni!» ¹⁰ Wee tuun wu ni a Wuruti di nuguro sin Bowazi fee ni, na wu pye:

«A ne bye dii na fereme ta mu naha taan, fo mu ya nuṅṅo naari ne na we, ne wemu wu ne nabun ge?»

¹¹ A Bowazi di jo: «Mu ya lemu beeri pye ma yasho wu mu ma poo wu nixhugo na ge, ni mu ya laha ma to we ni ma nu wu taan, na yiri laha ma fiige ki be ni, na ba shi watii wo fiige ni, kee kemu ki ne mu bi sanha kee ce-ε ge, p'a yee beeri naha jo ne mu.

¹² Lemu m'a pye ge, Tehenε Baa Kile wu ma saraa lee na! Tehenε Baa Kile wu saraa nɔfaṅa wo kan ma mu, Izirayeli wo Kile we, wee wemu wo kapaṅa nɔho ni m'a pa lara ge.

¹³ A Wuruti di wu pye: «Di fereme ta ma naha taan na kafɔɔ! M'a ma kapyebyezhɔ wu luu niṅε, na kafilasaama jo ni wu ni, na ta mu kapyebyezhaa pu d'a pɔrɔ be ne na.» ¹⁴ Ba liduun w'a pa nɔ we, a Bowazi di wu pye: «Fulo, ma da li, m'a ma buuri wu niṅε shiga ki ni ma li!» Wee tuun wu ni a Wuruti di diin shinmakoon pu kabanugo. A Bowazi di shinmapya nigaaga ka kan wu mu. A Wuruti di li fo na din, na kisaṅa keme yaha. ¹⁵ Ba w'a pa guri shinma wu nɔ kon na furi we, a Bowazi di wu kapyebyii pu pye: «Yi wu yaha wu da furi shinmapohɔɔ ki be te ni, wa ganha bu yaaga jo ni wu ni we! ¹⁶ Y'a shinma kaya ya be shaan niṅε na konho wu da yee be luu! Yi ganha ba wu zo yu we!

¹⁷ A Wuruti di shinma wu fugi Bowazi wo tege ki ni fo na she caṅa ki xo. Wemu w'a fugi ta ge, a wu wee sa. A wee di be ni kiloo kelee taanri (30) shishiin ni. ¹⁸ A wu ba ni wee shinma wu ni puga, na ba wu she wu yasho wu na. A Wuruti di wu caṅa yalige kisaṅa be yeege, na ki kan Nomi mu. ¹⁹ A Nomi di wu yege na: «Jogɔ wo tege ni ma d'a we

shinma we beeri fugi nijaa we? Tεge kekε ni ma di bye we? Sipya wemu w'a nuᅅo jaari ma na ge, Tεheεε Baa Kile wu duba weefoo mu!»

Ayiwa, Wuruti ya labye wu pye na caᅅa ki xɔ ná wemu keεεε ni ge, a wu yi beeri jaha jo wu yashɔ wu mu, na wu pye na wee ná wu meεε ki bye na Bowazi. ²⁰ A Nomi di wu ja shɔ wu pye: «Tεheεε Baa Kile wu duba wee ná wu mu! Bani w'a wu saama pu pyi wèe na ma na jo ba w'a pu pyi xuu pu be na we.» A wu jo sanha na: «Wèe cebooloo piimu p'a yaa na kasεεεε yaha wèe na, na wèe nuᅅo wolo ge, wee wa wu je Bowazi.»

²¹ Ayiwa, a Mowabu shi shen Wuruti wu jo sanha: «W'a ne pye sanha be na: «Ta furi na wo shinma wu kɔnvεε pu feni fo pu ba she shinma wu beeri kɔn xɔ.»» ²² A Nomi di Wuruti pye: «Lee kunni ya jɔ na poro, ta se m'a ma wo labye wu pyi ni wee wo kapyebyezhaa pu ni. Lee funᅅo ni ma wa da zhe nige watii wo tεge ni, di zhe kanhama pa nɔ mayε na we.»

²³ Wee tuun wu ni a Wuruti di ganha na se na shinma wu furi ni Bowazi wo kapyebyezhaa pu ni fo na she orije ni alikama yalɔɔɔ ti pye t'a xɔ. A wu gori yaha wà wu yashɔ wu taan.

3

Wuruti ya kaa lemu jeeri Bowazi mu ge

¹ Caᅅa ka Wuruti yashɔ Nomi ya pa wu pye: «Na poro, n'a da xuu wa sha ma mu kɔnhɔ m'a feεεε ta. ² Bowazi wemu wo kapyebyezhaa ni m'a bi labye wu pinne na byi ge, wèe ceboro wu je wii. Wee w'a wu wo shinma shuu fuu nijaa piige.

³ Wee tuun wu ni yìri m'a wuu, m'a nudanga sìnme pa tire, m'a ma fazaaya yi le, m'a shε shuu li na. Ga ma ganha bu mayε shε wu na na wu ta wu sanha li na gba wε. ⁴ Wu ba sinnε tuun wemu ni, m'a wu tasinnεε ki kemε sεeri xuuni, m'a fulo wu na, m'a wu fatɔŋɔ ki laha wu tɔɔyɔ yi na, m'a sinnε wu tɔɔyɔ yi ni. M'a yaa na lemu pye lee kadugo na ge, wuyε pyaa na yee saya naha jo ma mu.»

⁵ A Wuruti di wu nɔ shɔ na: «Keree kiimu bεeri m'a jo na mu ge, n'a da zhε ki bεeri pye.» ⁶ A Wuruti di gari shuu li na, wu yashɔ w'a keree kiimu bεeri jo wu mu ge, a wu shε kee bεeri pye.

⁷ A Bowazi di ba li, na gba a wu funŋɔ di sii taan xuuni, a wu gari na shε sinnε wu ɔrijε shinmapya wu tãan. A Wuruti di beele fulo wu na, na fatɔŋɔ ki laha wu tɔɔyɔ yi na, na sinnε wu tɔɔyɔ yi ni. ⁸ Ba nɪŋε k'a pa nɪ wε, a Bowazi di ba gburogi yìri, na jonɔ wii wu tɔɔyɔ ni wε, na cee wa nizinnεε ta wà.

⁹ A wu jo: «Jɔgɔ wi wε?» A cee wu jo: «Nε Wuruti wi, ma kapyebyezhɔ we! Ma fatɔŋɔ ki tɔ na na, bani wèe ceboro wemu w'a yaa na wèe nɪŋɔ wolo ge, wee mu nε.

¹⁰ A Bowazi di wu pye: «Wuruti, Tεhεnε Baa Kile wu duba ma mu! Le m'a pye mε nime ge, lee ya li shεε na m'a pye nɔmεε fɔɔ ma yashɔ wu shizhaa na na ye taashiinε li bε na. Bani mu bi da zii daha levεε p'a nɔhɔ ni, pu kabyaa fεε, kelee pu la baa fεε.

¹¹ Ayiwa nime, ma ganha bu fya wε na poro. Ma bu kaa bεeri jo na mu, lee n'a da bye ma mu. Bani pu bεeri ya li cε na mu ya pye cee wemu ya tii ge.

¹² Can wu nε wii, nε kunni nε yee ceboro, wemu ya yaa na mu nɪŋɔ wolo ge, ga yee ceboro wa nε wà, nɪwuuro t'a wee tεnε na ye nε na. ¹³ Shɔn naha!

Di ba she wee ná wu pɛɛgi jiga jisɔɔgɔ na, wu bu da wu na da zɔɔ wu ma juɔɔ wolo. Wu bu she sɔɔ, wu na li pye. Wu bu she li she, n'a da juɔmɛɛ lo ma mu, jo nɛ na ma juɔɔ wolo Tɛhɛnɛ Baa Kile jɔi wo wu mɛgɛ na. Sinnɛ naha fo jiga ba she mugi!

¹⁴ Wee tuun wu ni a Wuruti di sinnɛ Bowazi tɔɔyɔ yi ni fo na she kpɛɛngɛ pye ki na woni. A wu ba sɔɔ yiri na kpɛɛngɛ ki ta ki sanha nɔ wa wu wa cɛ wɛ. Bani Bowazi bi wu pye na wu ganha bu sipya wa shishiin yaha wu li cɛ na cee wa w'a pa shuu li na wɛ. ¹⁵ Ba w'a yiri na giin da gaanɔ wɛ, a Bowazi di wu pye: «Pa ni ma fadegbɔhɔ ki ni! M'a ki co xuuni!» A wu ki co xuuni, a Bowazi di ɔrijɛ shinma kiloo kɛ ni kaguro shishiin le ki ni, na wu tugo ki taan, na ganha na gaanɔ kanha ki ni.

¹⁶ Ba Wuruti ya she nɔ wu yashɔ wu na wɛ, a wee di wu yege na: «Dii yi d'a she da wɛ porofɔɔ we?» Lemu bɛɛri Bowazi ya pye wu mu ge, a wu lee bɛɛri paari wu yashɔ wu mu. ¹⁷ A wu wu yashɔ wu pye sanha: «Wee w'a we ɔrijɛ shinma kiloo kɛ ni kaguro we kan nɛ mu, bani w'a bi jo na nɛ kewayaya wo ya yaa na kuri pa jé mu fɛni wɛ. ¹⁸ Wee tuun wu ni a Nɔmi di wu pye: «Porofɔɔ we, tiin naha fo kii keree kii ba shɔnri shɔnrigana lemu na, bani wu ya kii keree kii shɔnri nihaa wɛ, wu jaha da ga jinɛ wɛ.

4

Bowazi ya Wuruti leɲɛ

¹ A Bowazi di gari kulo li tajege ki ju na, xuu wemu ni p'a ma keree ki shɔnri ge, a wu she diin wà. Bowazi bi ná wemu kaa jo Wuruti mu na juwuuro t'a wee tɛɛɲɛ xuuni ge, a wee di ba nɔ na

doroo. A Bowazi di wu pye: «Ee! Shen wefɔɔ, gbara naha, m'a diin!» A ná wu fulo, na diin. ²Wee tuun wu ni a Bowazi di kulo li nɔhɔlee ke wa naha bulo, na pee pye na pu be pu pa diin. A pu be di ba diin.

³Ayiwa, juwuuro t'a ná wemu teeɲe xuuni ge, a wu wee pye: «Nami kunni ya yiri Mowabu fiige ki ni na pa, m'a lee ce. W'a li she na wee da wu ceboroná Elimelēki wo tee ki pere. ⁴Ne jo di yi jo ma mu, jo ma ki shɔ kulo li nɔhɔlee pee, ni sipyii pusamaa beeri jii na piimu beeri pu wa naha ge. Ma bu da ma na da wu juɲɔ wolo, m'a wu juɲɔ wolo! Ma shiin bu da m'a da wu juɲɔ wolo we, m'a yee be jo na jii na. Bani juwuuro ti bu laha mu na, ne na t'a da nɔ.» A ná wu jo: «Uun, ne na wu juɲɔ wolo.» ⁵A Bowazi di jo sanha: «Ayiwa, ma bu tee ki shɔ Nami mu, wee tuun wu ni m'a yaa ma Mowabu shi shen Wuruti be juɲɔ wolo, kɔnhɔ shi di ba da wu poo wu nixhugo ki mu, wemu na ba bye wu cen wu ɔvɔɔ ge.» ⁶A ná wu jo: «Wee tuun wu ni, ni li je mu, n'a da já wu juɲɔ wolo nige we, bani ne bu lee pye, n'a da jaagi shan naye pyaa wo cen wu na. Wu juɲɔ wolo maye mu, lee be we n'a da já we. ⁷(Taashiine ni Izirayeli ni, wa bu wa keɲe yaaga shɔ kelee na ma juwuuro faa; kalee lemu li bi lee fiinne ge, lee li wa me: Wa wu da wu wo tanhaɲa wolo, na ki kan wa mu. Lee ma li she na lemu jɔ pu shuun wu beeri ya wo ge, na p'a be li juɲɔ ni.) ⁸Ná wemu na juwuuro ti bi nɔ ge, a wee di Bowazi pye: «Wu juɲɔ wolo!» A wu wu tanhaɲa wolo na kan wu mu.

⁹Ayiwa, sipyii piimu pu bye wà na fara nɔhɔlee pu na ge, a Bowazi di pu beeri pye: «Yee pu wa li seereɛ niɲaa na jo yaaga yaaga k'a bye Elimelēki

mu ge, ni yaaga yaaga k'a pye Kilijɔn ni Makilɔn mu ge, nε yee bεeri shɔ Nɔmi mu. ¹⁰ Lee funhɔ ni n'a da Mowabu shi shɛn Wuruti lɔ na pye na shɔ, Makilɔn ya xu na cee wemu yaha ge, kɔnhɔ shi di ba da wu nixhugo ki mu, na fara lee na, kɔnhɔ wu mεge ki ganha bu biin fεfεε wu cebooloo pu niηε ni wu to kulo li ni wε. Yee pu wa lee wo sεεfεε nijaa.»

¹¹ Ayiwa, nɔhɔεε pu fara sipyii pusamaa bεeri na piimu bεeri pu bye kulo li tajege ki jɔ na ge, a pu bεeri di jo: «Uun, wèe wa li sεεfεε. Cee we w'a jin ma puga ki ni ge, Tεhεnε Baa Kilε wu wu pye ba Arasheli ni Leya jε wε, pee piimu p'a Izirayeli nagoo pu bεeri se ge. Kilε wu fanha kan ma mu Efirata shi wu ni, wu mεge nigbɔhɔ da ma mu Bεtilεhemu kulo li ni! ¹² Tεhεnε Baa Kilε wu nagoo nijεhemεε da ma mu le cebilere le na, ma kpuun l'i bye Perεzi wuu li tuugo, Tamari ya Perεzi wemu se Zhuda mu ge.»

Nɔmi ya jɔbige ka ta

¹³ Ayiwa, a Bowazi di Wuruti lenε. A Tεhεnε Baa Kilε di duba wu mu. A wu yere yacεε na, na funana se. ¹⁴ A Bεtilεhemu wo cεe p'i ganha na Nɔmi pyi: «Tεhεnε Baa Kilε w'a sɔni! Sipya wemu w'a da ba ma lɔ wu yere ni ma keree bεeri ni ge, w'a wee pye wee ya se nijaa. Kilε wu mεge nigbɔhɔ da we pya we mu Izirayeli fiige ki ni! ¹⁵ We pya we na ba ma luu jinε, na yere ni ma keree ni ma ni ma lεge ki bε ni. Ma ja shɔ we, w'a ye jalaa gbarashuun na, bani ma kaa l'a dan wu ni. Wee w'a ke jɔbige ke se ma mu.

16 A Nəmi di pya wu co, na wu taha wu dodonɔ na. Wee shiin w'a wu lɔ, na ganha na wu biini. 17 A Nəmi wo tiinɲii cèe p'i ganha na mujonɔɔ waa na yu: «Nəmi ya ja ta!» Pu ni Nəmi ni, a p'i pya wu mɛgɛ le na Obɛdi (lee kóri ɲɛ wemu w'a fungɔngɔ yeri sipya na ge). Obɛdi w'a pye Izayi wo to we, Izayi di ɲɛ saannaa Dawuda to.

Saannaa Dawuda nəhɔ tayirige

18 Perɛzi wo kadugo ki sipyii pu mɛyɛ yi ye:

- Perɛzi w'a Ɛsirɔmu se.
- 19 A Ɛsirɔmu di Aramu se.
A Aramu di Aminadabu se.
- 20 A Aminadabu di Nasɔn se.
A Nasɔn di Salimɔ se.
- 21 A Salimɔ di Bowazi se.
A Bowazi di Obɛdi se.
- 22 A Obɛdi di Izayi se.
A Izayi di saannaa Dawuda se.

KARINĒĒGE NŌMĒE NIVONŌ
New Testament and Shorter Old Testament in
Senoufo, Mamara

copyright © 2014 Wycliffe Bible Translators, Inc.

Language: Mamara Sėnoufo (Sėnoufo, Mamara)

Translation by: Wycliffe Bible Translators

Contributor: Wycliffe Bible Translators, Inc.

© 2014-08-10, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 21 Feb 2024 from source files dated 29 Jan 2022

85728ed7-78f8-58e8-8967-0e976c0c2423